

Uttale vedrørende opprusting til felles ungdomsskule på Årås skule

- Ut i frå teikningane til dei nye alternativa for ombygging av Årås skule (der det ikkje er tilbygg til D-blokka) ser vi at Austrheim skulekorps i praksis er kasta ut frå øvingslokalet vårt. Det rommet korpset bruker til oppbevaring av instrument, notar og alt vi er avhengige av for å gjennomføre øvingar er her sett opp som grupperom. Vi stiller eit stort spørsmål ved kvifor korpset ikkje har fått tilsendt teikningar og fått høve til å uttale seg!
- Skulekorpset er eit viktig fritidstilbod for barn og unge i kommunen og ein viktig aktør i kulturlivet i Austrheim. Eit minimumskrav for at det i det heile tatt skal vere mogleg å drive korps, er å ha øvingslokale med tilknytta utstyrsrom. På desse teikningane er landskapet i D-blokka, som er vårt grupperom, vesentleg krympa på grunn av grupperomhusa. Og når vi ikkje har nokon plass å oppbevare t.d. pauker, marimba og anna slagverksutstyr, blir det heilt umogleg å gjennomføre øvingar. Å frakte dette utstyret frå ein annan stad kvar veke er IKKJE eit alternativ.
- Korpset bruker også skulen når vi har seminar og sosiale tilstellingar. Sist under musikkaktivitetshelga 11. 12. september. Då hadde vi musikkopplæring og sosiale aktivitetar for 29 barn. 10 dyktige ungdommar sto for alt frå direksjon, arrangement av musikk, musikkundervisning, leiing av kor og musikkleik til hjelp med matlaging og praktiske ting. For å få til slike arrangement, treng vi eit lokale med både eit stort rom, fleire mindre rom og kjøkken. Altså ein skule. Men dersom vi ikkje har utstyrsrommet vårt der, blir det så mykje arbeid med tillaging, rydding og transport at det blir heilt umogleg å gjennomføre.
- Alle alternativa som går ut på å presse ein samanslått ungdomsskule inn i eksisterande bygningsmasse vil altså, i tillegg til å gi utruleg dårlege rammevilkår for læring og trivsel for elevane i skuletida, rasere ein stor del av fritidstilbodet for dei same elevane.

Vi bed om at kommunen tek omsyn til at barn og unge i Austrheim kommune framleis skal ha moglegheit til å delta i den sosiale, inkluderande og utviklande musikalske fellesskapene eit korps er. Då må det byggjast nytt tilbygg til D-blokka, ikkje øydeleggje eksisterande bygg med ombyggingar som ikkje samsvarer med det som er den faktiske og heilskaplege bruken av skulebygget.

Vennleg helsing

Styret i Austrheim skulekorps